



Lectio Divina

Septiembre 2022



Ika-4 nin Septyembre, 2022

Ebanghelyo para sa Ika-23 na Domingo

Kan Ordinaryong Panahon (Taon- C)

Lukas 14: 1, 25-33

¹Sarong aldaw na Sabbath, nagkakan si Jesus sa harong nin sarong lider na kaayon kan mga Pariseo. Duman pinagmasdan Sya kan mga tawo.

²⁵Kadakul kan tawong nagsunod ki Jesus. Nag-atubang Sya sainda asin nagsabi,"
²⁶"Kun buot nindong magsunod Sako alagad dai nindo kayang talikdan an saindong ama asin ina, an saindong agom asin mga aki, an saindong mga tugang pati an saindong sadiri, dai kamo pwedeng magin Sakong mga disipulo. ²⁷An dai magpasan kan krus asin dai magsunod Sako dai pwedeng magin disipulo Ko. ²⁸Sisay saindo an may planong magtugdok nin tore na dai muna magtukaw asin magkwenta kun igwa syang bastante para matapos ini? ²⁹Ta kun ikabugtak na nya an mga pundasyon asin dai sya makapahaman, pagngingisihan sya kan gabos, ³⁰asin sasabihan, 'An tawong iyan nagpuon magtugdok alagad dai nakapahaman!' ³¹Kun may sarong hadi na buot makigyera sa saro man na hadi, iisipon nguna nya kun kaya nyang makilaban na dyes mil sana an suldados nya tumang sa bente mil. ³²Kun dai nya kaya, mapadara sya nin mga sugo asin mahagad nin katuninungan mantang harayo pa an saiyang kalaban. ³³Siring man, an dai saindo mabaya kan gabos na sadiri nya, dai magigin disipulo Ko.

Giya sa paghurop-huop asin paghiras

"Kun buot nindong magsunod Sako alagad dai nindo kayang talikdan an saindo ama asin ina, an saindong agom asin mga aki, an saindong mga tugang, pati an saindong sadiri, dai kamo pwedeng magin Sakong mga disipulo."

Iyo ini an inot sa mga kondisyon na itinatao ni Jesus dapit sa pagigin disipulo. An dapat na sunudon mayong iba kundi si Jesus. Kun an hinahagad kan satong pamilya salungat sa kahagadan ni Jesus, dapat nyato ining talikdan dawa pa ikaraot kan buot kan satong pamilya. Urog mahalaga an kabutan kan Dyos kisa kan satong pamilya asin sadiri.

Kaya ko daw magsuway sa sakong pamilya kun alukon ako ni Jesus na magtabang sa Saiyang Simbahan?

"An dai magpasan kan krus asin dai magsunod Sako dai pwedeng magin disipulo Ko."

Mayong ibang padumanan si Jesus kundi sa Jerusalem kun sain Sya ipapako sa krus. Para Saiya, an tunay na disipulo mayo nang panahon sa pamasyar o sa bakasyon. An umiba Saiya sagkod sa Kalbaryo iyo an tunay Nyang disipulo.

Ano an mga krus na sakong nasasabatan sa sakong aroaldaw na pagkabuhay? Ano an atitud ko sa mga krus na ini?

"Sisay saindo an may planong magtugdok nin tore na dai muna magtukaw asin magkwenta kun igwa syang bastante para matapos ini?"

An pagigin dispulo bakong suba-suba, bakong kawat. Inaalok kita ni Jesus na maghurop-hurop na marhay bago magsimbag sa Saiyang imbitasyon.

Pirang panahon an itinatao ko sa paghurop-hurop dapit sa sakong pagigin disipulo? Sa paghurop-hurop na ini, sisay baga an sakong sinusunod, si Jesus o an sadiri ko man sana?

Ika-11 nin Septyembre, 2022

Ebanghelyo para sa ika-24ng Doming

nin Ordinaryong Panahon (Taon C)

Lukas 15: 1-32

¹Sarong aldaw, nagdulok ki Jesus an dakul na parasingil nin buhis asin mga parakasala sa paghinanyog Saiya. ²Naggumod-gumod an mga Pariseo asin an mga paratukdo kan Katugunan, "An lalaking ini minaako nin mga parakasala saka nagkakakan sa kaibahan ninda!" ³Kaya inusipon sainda ni Jesus an parabolang ini, ⁴"Halimbawa saro saindo igwa nin sanggatos na karnero alagad may sarong mawara, ano an gigibuhon nya? Bako daw na babayaan nya an nobenta y nwebeng karnero sa pasabsaban dangan hahanapon an saro na nawawara sagkod na makua nya? ⁵Kun makua na, maugmang ibinubugtak nya iyan sa saiyang abaga. ⁶Pag-abot nya sa harong, inaapod nya an saiyang mga katuod saka mga kataid asin sinasabihan, 'Mag-ugma kita, huli ta nakua ko na an karnerong nawara!' ⁷Siring man sinasabihan Ko kamo, urog pa an magigin kaugmahan sa langit huli sa sarong parakasala na

nagsulsol, kisa nobenta y nwebeng matanos na dai nangangaipong magsulsol.

⁸“Halimbawa igwa nin sarong babae na may sampulong kwartang plata, alagad nawaran sya nin saro, ano an gigibuhon nya? Bakong susuluan nya an ilawan, sisighidan an harong asin hahanapon nin maigot an nawawarang kwartang plata sagkod na makua nya iyan? ⁹Kun makua nya, inaapod nya an saiyang mga katuod saka mga kataid asin sinasabihan, ‘Mag-ugma kita ta nakua ko na an nawawara kong kwartang plata!’ ¹⁰Siring man sinasabihan Ko kamo, na an mga anghel nin Dyos nag-uugma huli sa sarong parakasala na nagsulsol.”

¹¹Nagsabi pa si Jesus, “Igwa nin sarong tawo na may duwang aking lalaki. ¹²An nguhod nagsabi sa ama, ‘Ama ko, tawan na sako an kahirasan ko!’ kaya pinagbanga kan ama sa duwang aki nya an saiyang pagsadiri. ¹³Pakalihis nin nagkapirang aldaw, dinara an gabos na pagsadiri kan nguhod na aki asin nagduman sa harayong lugar kun sain sinayang an saiyang kwarta sa buhay nin kalaswaan.¹⁴Naubos an gabos nyang kwarta. Dangan nagkaigwa nin makuring gutom sa lugar na idto asin nagpuon man syang magtios. ¹⁵Kaya nagdulok sya asin nagpatandan sa saro na taga-duman; isinubol sya kaini sa saiyang uma tanganing mag-ataman kan mga urig. ¹⁶Buot kutana nyang malaugan an saiyang tulak maski kan mga ibinabahog sa mga urig, alagad mayo nin nagtao saiya nin anuman. ¹⁷Kan makapag-isip-isip sya, nagsabi sya, ‘Sobra an kakanon kan gabos na tinatandanan na trabahador duman sa harong kan amo ko, mantang ako magagadan digdi sa gutom! ¹⁸Babayaan ko an lugar na ini asin mabalik ako sa sakong ama asin sasabihan ko sya, ‘Ama ko, nagkasala ako sa Dyos asin saimo. ¹⁹Bako na akong maninigo na apudon pang aki mo; ibilang mo na sana akong saro kan saimong mga tinatandanan na trabahador,’” ²⁰Kaya naglakaw sya papuli sa saiyang ama. “Harayo pa, natatanaw na sya kan ama nya. Naherak nin marhay an saiyang ama, kaya nagdalagan ining nagsabat saiya, kinugos sya saka hinadukan. ²¹Sinabihan kan aki an saiyang ama, ‘Ama ko, nagkasala ako sa Dyos asin saimo. Bako na akong maninigo na apudon pang aki mo. Ibilang mo na sana akong saro kan saimong mga tinatandanan na trabahador.’ ²²Alagad inapod kan ama an saiyang mga suruguon, ‘Dali kamo; daraha nindo digdi an pinakamarhay na gubing asin sulutan nindo sya saka sapatusan. ²³Dangan daraha digdi an pinatabang ugbon na baka asin bunua! Mag-ugma kita! Magbangkete kita! ²⁴Huli ta an aki kong ini na gadan na, alagad ngunyan nabuhay liwat; nawara, alagad nakua na.’ Kaya nagpuon sindang mag-urugma. ²⁵“Kan oras na iyan, an matuang aki papuli na hali sa uma. Kan harani na sya sa harong, nakadangog sya nin musika asin sarayaw. ²⁶Inapod nya an saro kan mga suruguon dangan hinapot kun ano an nangyayari. ²⁷Nagsimbag an suruguon, ‘Nag-abot na an tugang mo! Pinabuno kan saimong ama an pinatabang ugbon na baka huli ta nakabalik syang ligtas saka buhay.’ ²⁸Anggot sya asin habo nyang maglaog; kaya nagluwas an saiyang ama asin pinaki-ulayan syang lumaog. ²⁹Alagad sinabihan nya an saiyang ama, ‘Hilinga man daw, pinaglingkudan taka sa haloy na panahon, asin dai ko linapas an saimong kabutan, alagad ano man lamang an itinao mo sako? Mayo, maski sarong sadit na kanding tanganing mag-ugma ako kaiba kan sakong mga katuod! ³⁰Alagad pagpuli kan aki mong iyan na nagsayang kan saimong pagsadiri sa mga maraot na babae, ipinabuno mo pa an pinatabang ugbon

na baka!' ³¹Nagsimbag an ama, 'Aki ko, danay kang nasa kaibahan ko, asin saimo an gabos na sadiri ko. ³²Alagad dapat kitang magbangkete saka mag-ugma huli ta an tugang mong ini gadan na, alagad nabuhay liwat; nawara, alagad nakua na.'"

Giya sa paghurop-huop asin paghiras

"Dinara an gabos na pagsadiri kan nguhod na aki asin nagduman sa harayong lugar kun sain sinayang an saiyang kwarta sa buhay nin kalaswaan."

Nakakaagid kita sa aking ini. Naghagad kita kan grasya sa Mahal na Dyos. Winarasan kita nin buhay, nin isip, nin kakayahan, nin pamilya, asin dakul pang iba. Alagad, kadaklan kan iwinaras sato kan Dyos satong sinayang. Ginamit ta an satong buhay, isip, asin kakayahan sa karatan.

Ano an mga grasya na nakamtan ko sa Dyos? Sain ko an mga ini sinayang?

"Babayaan ko an lugar na ini asin mabalik ako sa sakong Ama..."

Dai pa huri an gabos. Napukawan an isip kan nguhod na aki. Aram nya an buhay kan yaon pa sya sa saiyang Ama. Buot nya idtong balikan. Nagbasol sya. Makusog an buot nyang papatawaron sya kan saiyang Ama. Alagad, pinaghandaan nya ini. Inisip nya kun ano an makakapalumoy kan buot kan saiyang Ama. Aram nya na padangat sya kaini.

Andam daw akong bayaan an buhay nin pagkakasala? Dakula daw an tiwala kong papatawaron ako kan Mahal na Dyos? Kaya ko daw na tawan ining panahon?

"Anggot sya asin habo nyang maglaog."

Dawa an matua nagpawalat sa harong kan Ama huli kan pagkawara kan nguhod na aki. Kaya kan ini magbalik, nakamati an matua nin pagkuri, bakong kaugmahan. Dai sya nakanuod kan pagkaherak.

Sa sakong pagkaugos sa Simbahan, namamatian ko daw an kamunduan kan

Dyos huli kan mga kadukhaan na nawawara sa tamang dalan? Mauugmadaw ako kun sinda makabalik giraray sa Mahal na Dyos?

Ika-18 nin Septyembre, 2022

Ebanghelyo para sa ika-25ng Domingo

Kan Ordinaryong Panahon (Taon C)

Lukas 16: 1-13

¹Nag-usipon man si Jesus sa Saiyang mga disipulo, "Igwa nin sarong mayaman na may enkargado na namamahala kan mga pagsadiri nya. Nakaabot sa mayaman na ini an bareta na an pagsadiri nya pinagpaparagasto kan enkargado. ²Kaya ipinaapod nya saka tinaraman, 'Ano ining nadadangog ko manungod saimo? Tawi ako nin kwenta kan palakaw mo sa pagsadiri ko huli ta dai ka na pwedeng magin sakong katiwala.' ³Nagsabuot an enkargado, 'Hahalion na ako sa trabaho kan sakong kagurangnan. Ano na an gigibuhon ko? Maluya akong makilimos. ⁴Aram ko na an gigibuhon ko tanganing kun mayo na ako nin trabaho, akuon ako kan sakong mga katuod sa saindang harong!' ⁵Kaya saros-saro nyang inapudan an mga may utang sa saiyang kagurangnan. Hinapot nya an inot, 'Gurano an utang mo sa sakong kagurangnan?' ⁶Nagsimbag idto, 'Sanggatos na bariles nin lanang oliba. Tinaraman sya kan enkargado, 'Uya an listahan kan saimong utang. Dali, tukaw na asin isurat mong singkwenta.' ⁷Hinapot man nya an saros, 'Ika man, gurano an utang mo?' Nagsimbag ini, 'Sanggatos na sako nin trigo.' Sinabihan sya kan enkargado, 'Uya an listahana kan saimong utang; otsenta sana an isurat mo.' ⁸Inumaw kan kagurangnan an madayang enkargado huli ta ginamit nya an saiyang isip. Huli ta an mga aki kan kinaban na ini mas madudunong magpalakaw kan pagsadiri ninda kisa sa mga aki nin liwanag." ⁹Nagpadagos si Jesus sa pagtaram, "Kaya sinasabihan Ko kamo, gamiton nindo an mga kayamanan sa kinaban na ini nganing makakua kamo nin mga katuod. Maubos man iyan, may mapadagos pa saindo sa irukan na mayong katapusan. ¹⁰An maimbod sa dikit na bagay, maimbod man sa dakul; an madaya sa dikit na bagay, madaya man sa dakul. ¹¹Kaya kun dai kamo mapapaniwalaan kan kayamanan sa kinaban na ini, siisay an mapaniwala saindo kan tunay na kayamanan? ¹²Kun dai kamo mapapaniwalaan kan sadiri nin iba, siisay an matao saindo kan talagang para saindo? ¹³"Mayong surugon na makakapaglingkod sa duwang kagurangnan, huli ta ikakaungis nya an saros asin mamumutan nya an saros; magigin maimbod sya sa saros asin pag-uulog-ulugon an saros. Dai kamo makakapaglingkod sa Dyos saka sa kayamanan."

Giya sa paghurop-huop asin paghiras

"Dai ka na pwedeng magin sakong katiwala."

Pinatalsik sa trabaho kan mayaman an saiyang suruguon. Huli kan mga nadadangog nyang mga huring-huding, nawara an saiyang tiwala sa saiyang sadiring tauhan. An katiwala inaapod nyato sa Ingles na *steward*. Sya an nagpapadalagan kan satong mga pagrugaring. An mga drayber na nagba-*boundary* siring sa katiwala. An mga nag-uuma kan daga nin iba, an mga kasambahay—mga halimbawa sinda kan katiwala. Mahalaga na sinda natitiwalaan.

Ano an hinahanap kong ugali sa sakong mga katiwala? Ano an ugali ko bilang sarong katiwala?

"Ano an sakong gigibuhon?"

Mahalaga an puturo. Ini an tulos na inisip kan katiwala. Mawawaran syang trabaho. Alagad dai sya nagmuto-muto. Dai sya nagdrama. Ginamit nya an saiyang isip. Aram nya an saiyang kaluyahan. Aram nya man an saiyang kakayahan. Iniisip nya an saiyang paggurang.

Kun igwa ako nin *emergency*, iniisip ko daw an puturo kan sakong pamilya? O iniisip ko sana an presente kong pangangaipo?

"Asin inumaw kan Kagurangnan an madayang katiwala huli ta ginamit nya an saiyang isip."

Dai inuumaw ni Jesus an salang solusyon kan maraot na katiwala. An inuumaw nya iyo an listong paggamit kan isip kaini. Habo ni Jesus kan kurapsyon. Habo kan mayaman na iyo an nag-empleyo sa katiwala nin tawong dai matitiwalaan. Alagad, pinapagirumdom ni Jesus an halaga kan paggamit kan satong pag-iisip, paghurop-hurop, pag-atid-atid para sa satong kaaabtan.

Ano an mga salang solusyon ko na sakong pinagbasulan? Ano an adal na naguno ko duman?

Ika-25 nin Septyembre, 2022

Ebanghelyo para sa Ika-26 na Domingo

Kan Ordinaryong Panahon (Taon C)

Lukas 16: 19-31

¹⁹"Igwang mayaman na nakabadong purpura asin masisiram an mga kinakakan aroaldaw. ²⁰Asin nakahigda sa saiyang pintuan an sarong dukha na an ngaran Lazaro; pano nin lugad an hawak niya. Danay syang nakatukaw sa may pintuan kan mayaman, ²¹nagmamawot na makakakan dawa kan mga rakdag na nahuhulog sa lamesa kan mayaman. Lain pa kaiyan, rinaranihan asin dinidilaan kan mga ayam an mga lugad nya. ²²Kan an dukha nagadan, dinara sya kan mga anghel sa daghan ni Abraham, ²³dangan nagadan man an mayaman, asin ilinubong, asin duman sa impyerno kun sain sya nagsasakit, nakimaherak ki Abraham. ²⁴Kaya nagkurahaw sya, 'Amang Abraham! Kaheraki man ako! Sugua man si Lazaro na idutdot an muro nya sa tubig tanganing paliputan an dila ko, huli ta nasasakitan ako nin makuri sa kalayong ini! ²⁵Alagad sinabihan sya ni Abraham, 'Ako ko, girumduma na kan nabubuhay ka pa sa daga, nakamtan mo an gabos na kaginhawahan, mantang si Lazaro anas pagtios. Ngunya nasa kaginhawahan sya digdi mantang ika nagtitios. ²⁶Lain pa kaiyan, igwang hararom na ampas sa pagultanan ta, tanganing dai makabalyo digdi an yaon dyan.' ²⁷Nagsabi an mayaman, 'Kun siring, nakikiulay po ako, Ama, na isubol mo si Lazaro sa harong kan sakong ama, ²⁸huli ta igwa pa ako duman nin limang tugang na lalaki. Padumanon mo sya nganing patanidan sinda, ta tibaad makadigdi man sinda sa lugar na ini nin kasakitan.' ²⁹Alagad sinabihan sya ni Abraham, 'Yaon sainda si Moises saka an mga propeta; kaya dapat na magdangog sainda an mga tugang mo.' ³⁰Nagsimbag an mayaman, 'Dai, Amang Abraham; alagad kun may sarong mabuhay liwat na magduman sainda. Mabakli sinda.' ³¹Sinabihan sya ni Abraham, 'Kun dai sinda magdangog ki Moises asin sa mga propeta, dai man sinda matubod maski pa may mabuhay liwat sa mga gadan.'"

Giya sa paghurop-huop asin paghiras

"Igwang mayaman na nakabadong purpura... Asin nakahigda sa saiyang pintuan an sarong dukha na an ngaran Lazaro..."

Ini an ladawan kan banwaan. Ini an kamugtakan kan parokya. Igwang mayayaman. Igwang mga dukha. An nagsusuway sainda iyo an pintuan kan mayaman. An mayaman mayong pagmakulog sa dukha. Alaga an dukha may pangaran. An buot sabihon kan Lazaro, an Dyos nagtatabang. Sa mata kan Dyos, si Lazaro sana an saiyang midbid. Sya sana an nakasurat sa libro kan kaligtasan.

Ano an ugali ko sa mga dukha, lalo na sa mga mayong pakinabang sa sakuya?

"Kan an dukha nagadan, dinara sya kan mga anghel sa daghan ni Abraham, dangan nagadan man an mayaman, asin ilinubong, asin duman sa impyerno kun sain sya nagsasakit, nakimaherak ki Abraham..."

Nainot magadan an dukha. Tinawan pagkakataon an mayaman na magbago. An susi sa saiyang kaligtasan iyo an pagtabang sa dukha. Alagad pinalampas nya ini. Kaya, kan an dukha madagan, nagadan man an posibilidad na sya makaligtas. An dukha na saiyang siniblag iyo an kinugos ni Abraham. An nagsiblag na mayaman iyo man an sinayumahan ni Abraham.

Ano an ginigibo ko ngunyan na paagi sa pagtabang sa mga dukha?

"Nakikiulay po ako, Ama, na isubol mo si Lazaro sa harong kan sakong ama..."

Nasabutan na kan mayaman na si Lazaro sana an makakatabang sa saiyang limang tugang. Maibabalik sana an hustisya sa kinaban kun ibalik sa dukha an kinamkam kan mayaman huli sa kapasluan. Alagad an simbag ni Abraham: yaon sainda an Bibliya. Dyan nakasurat an mga tugon nin Dyos dapit sa pagtabang sa dukha.

Ano an tabang kan Bibliya tanganing masabutan ko an kamugtakan kan mga dukha na nakapalibot sa sakong banwaan asin parokya?

Come Holy Spirit

Ingles na Bersyon

Come Holy Spirit, we need you
Come Holy Spirit, we pray
Come in your strength and your power
Come in your own special way

Come like a spring in the desert
Come to the weary of soul
Lord, let your sweet healing power
Touch me and make me whole

Come Holy Spirit, we need you
Come Holy Spirit, we pray
Come in your strength and your power
Come in your own special way

Bikol na Bersyon

Madya Espiritu Santo, kami pakabanala
Madya sa Simong kabagsikan, madya kami suruga
Haprusa an samong mga lugad, madya kami bulunga
Madya sa mga nagsasakit, madya kami ampuna.

Resuene Vibrante

Resuene vibrante el himno de amor
Que entona tu pueblo con grata y emocion
Resuene vibrante el himno de amor
Que entona tu pueblo con grata emocion
Patrona del Bicol Gran Madre de Dios
Se siempre la Reina de Nuestra Region
Patrona del Bicol Gran Madre de Dios
Se siempre la Reina de Nuestra Region.

Maski an kasalogan, Sambit an si'mong ngaran
Maski an kabukiran, Ika an rokyaw.
Kami si'mong aki, Pano' nin kaogmahan
Si'mong nangangako, Ika kamo'tan.
Kami si'mong aki, Pano' nin kaogmahan
Si'mong nangangako, Ika kamo'tan.

Awiton an awit nin pagkamoot
Sa saimo samuyang idinodolot
Awiton an awit nin pagkamoot
Sa saimo samuyang idonodolot.
Patrona nin Bikol, Ina ka nin Dios
Magdanay na Reina nin samuyang region,
Patrona nin Bikol, Ina ka nin Dios
Magdanay na Reina nin samuyang region.

Patrona nin Bikol, Inang mamomo'ton
Pamanang banal, Balaog nin Dios.
Pakihimatea mga inagrangay, Kan si'mong banwaan
Na napaalaw.
Patrona nin Bikol, Inang mamomo'ton
Pamanang banal, Balaog nin Dios.
Pakihimatea mga inagrangay, Kan si'mong banwaan
Na napaalaw.

Resuene vibrante el himno de amor
Que entona tu pueblo con grata y emocion
Resuene vibrante el himno de amor
Que entona tu pueblo con grata emocion
Patrona del Bicol Gran Madre de Dios
Se siempre la Reina de Nuestra Region